

DOMINGU XXIX TEMPU KOMÚN – TINAN C

Tema

Liafuan ne'ebé liturjia ohin nian aprezena mai ita konvida ita atu mantein relasaun metin ho Maromak, komuñaun íntima, diálogu insistente ida: nune'e de'it mak fiar-na'in ida bele aseita Maromak nia projetu sira, komprende ninia silénsiu sira, respeita ninia ritmu sira, fiar iha ninia domin.

Evanjellu fó hanoin katak Maromak la auzente ka taka matan ba Povu nia terus... Fiar-na'in sira tenke deskobre katak Maromak hadomi sira no soi projetu salvasaun ida ba ema hotu; deskoberta ne'e bele halo de'it liuhusi orasaun, diálogu kontínuu no perseverante ho Maromak.

Leitura dahuluk halo ita entende katak Maromak intervein iha mundu no salva ninia Povu, dalabarak hodi uza ema sira nia hahalok: maibé atu ema manán funu todan ezisténsia nian, nia tenke konta ho Maromak nia tulun no kbiit... Tulun no kbiit ne'e mai husi orasaun, diálogu ho Maromak.

Leitura daruak, maski la refere direktamente ba relasaun entre fiar-na'in ho Maromak, aprezena fonte privilejiada ida enkontru entre Maromak no ema: Sagrada Eskritura... Nu'udar Maromak nia Liafuan ne'ebé hatudu ba ema sira dalan ba moris nakonu, nia tenke asume fatin aas iha esperiénsia sarani.

LEITURA I – Ex 17,8-13a

Leitura dahuluk nia kontestu mak ebreu sira nia dalan iha rai-fuik maran (molok tama iha Rai Prometida) no iha kuadru konfrontu violentu entre ebreu sira no grupu ida makhorik sira rai-fuik maran nian.

Funu-baluk sira ne'ebé, iha epizódiu ida-ne'e, ebreu sira tenke hasoru hanaran “Amalek”. Lista sira iha Gn 36,12.16 liga ho bei-oan sira Esaú nian, ne'ebé halo sira parente ho ebreu sira... Povu sira-ne'e mak tribu sira la'o-rai, violenta no agresiva (Dt 25,17-19) ne'ebé hela iha Negev (kf. Nm 13,29; Jz 1,16) no opoin atu israelita sira la tama iha Rai Prometida. Iha tempu ikus amalesita sira mós sai inimigu ba Saúl (kf. 1 Sm 15) no David (kf. 1 Sm 30). Ba ebreu sira, sira mak inimigu boot liu.

Atu komprende di'ak liután testu ne'ebé propoin iha-ne'e, presiza hanoin katak tradisaun sira kona-ba libertasaun (Ex 1-18) soi nu'udar objetivu primordiál halo katekeze ida kona-ba Maromak libertadór, ne'ebé salva nia Povu husi opresaun no mate, halo nia la'o ain la bokon iha tasi Mean no lori nia liuhusi rai-fuik maran... Importante iha ne'e mak katekeze kona-ba Maromak ne'ebé ema Israel tenke agradese ba ninia vida no ninia liberdade.

MENSAJEN

Ita-nia istória haktuir konfrontu ida entre ebreu sira ne'ebé la'o iha rai-fuik maran kontra amalesita sira; enkuantu Josué no Povu hafunu inimigu sira, Moisés, iha foho tutun, harohan no husu Maromak nia tulun... Tuir katekista sira Israel nian, enkuantu Moisés nia liman foti sa'e, ebreu sira iha vantajen hasoru inimigu sira; maibé bainhira Moisés, kole, hatún nia liman sira, amalesita sira mak domina. Solusaun mak tau Araun no Hur iha Moisés nia sorin, atu tahan nia liman sira, nune'e israelita sira manán amalesita sira.

Pájina ida-ne'e mak katekeze ida, iha-ne'ebé, teólogo sira Israel nian hakarak eduka nia Povu; katekeze ne'e hakarak hanorin katak libertasaun la mai husi Povu nia esforsu sira maibé Maromak nia asaun.

Husi parte seluk, katekeze ne'ebé testu ne'e propoin subliña imporánsia orasaun nian. Mensajen mak ne'e: presiza bolu Maromak libertadór ho perseveransa no insisténsia. Atu manán funu todan sira ne'ebé vida prezenta, presiza iha Maromak nia tulun no kbiit; no tulun ne'e mai husi diálogu kontínuu, nunca para, entre fiar-na'in ho Maromak.

LEITURA II – 2 Tim 3,14-4,2

Leitura daruak oferese mai ita, dala ida tan, Surat Daruak ba Timóteo. Ita fó hanoin dala ida tan katak surat ne'e nia kontestu mak finál sékulu I no inísiu sékulu II, iha altura ida iha ne'ebé comunidade sarani sira hasoru persegisaun organizada sira, fiar-na'in sira lakon entuziazmu no doutrina falsa sira... Autór surat ne'e nian hakarak konvida fiar-na'in hotu ho modu jerál (no animadór sira comunidade nian ho modu partikulár) atu deskobre filafali entuziazmu ba Evanjellu no defende an husi buat hotu ne'ebé hamenus lialoos mai husi Jezús ne'ebé Apóstolu sira tatoli.

MENSAJEN

Testu ohin propoin ezortasaun ida ba Timóteo, atu mantein fiél ba doutrina loos nia simu husi Tradisaun no Eskritura. Iha ne'e bele haree ona kritériu dixernimentu sira atu distinge doutrina loos husi ida falsa iha sékulu II: garantia ba lialoos mak ema ne'ebé hanorin mak susesór lejítimu ida apóstolu sira-nian (husi sira nia simu autoridade atu anima no tau-matan ba Kreda) no tranzmite ho fidelidade lialoos ne'ebé nia simu husi apóstolu sira, tuir Eskritura. Lialoos iha Eskritura “inspirasaun husi Maromak” (“théopneustos”, Maromak mak intervein iha autór umanu); tanba ne'e, iha Eskritura ita hetan “sabedouria ne'ebé lori ba salvasaun” (3,15). Eskritura nia utilidade haktuir liuhusi verbu forte haat: “hanorin”, “perzuede”, “korrije” no “forma”. Nune'e ita haree momoos katak Eskritura mak fonte ba formasaun no edukasaun sarani, atu hamosu “ema perfeito” (3,17).

Iha versíkulu ikus sira testu nian (4,1-2), kontinua ezortasaun ba Timóteo atu kumpre ninia knaar animadór comunidade sarani nian ho forma adekuada no ho entuziazmu, hodi la bele ta'uk, lahó respeitu umanu, hodi la moe, “ho pasiénsia tomak no doutrina” (katak ho pedagogia pastorál adekuada).

EVANJELLU – Lc 18,1-8

Evanjellu prezenta mai ita etapa ida tan “dalan Jerusalém nian”. Testu ne'ebé ohin propoin mai ita mai iha sekuénsia diskursu eskatolójiku kona-ba Mane Makso'ik nia fila hikas iha glória (kf. Lc 17,20-37). Ita presiza entende ai-kanoik juiz no feto-faluk iha ambiente ne'e. Testu ne'e laiha paralelu seluk iha evanjelista seluk; maski nune'e, nia hanesan ho belun ne'ebé mai husu paun iha kalan-boot no hetan atendumtu tanba ninia insiténsia (kf. Lc 11,5-8).

Ita keta haluha katak Lucas hakerek Evanjellu datoluk ne'e iha tinan 80... époka ida iha-ne'ebé comunidade sarani sira sofre tanba judeu no jentiu sira nia ostilidade no iha-ne'ebé hahú hatudu persegisaun boboot hasoru comunidade sarani sira iha finál sék. I. Sarani sira laran la hakmatek, dezanimadu no hein atu Kristu fila hikas lalais – katak, intervensaun definitiva Maromak nian iha istória atu halakon ema aat sira no so'i nia Povu.

MENSAJEN

Ita-nia testu haktuir ai-kanoik ida no ninia aplikasaun teolójika.

Personajen sentrál ai-kanoik nian (vers 2-5) mak fetó-faluk ida no juiz ida. Fetó-faluk, kiak no la hetan justisa (iha Bíblia, mak protótipu ema kiak sira lahó defeza, vítima ema riku no kbiit-na'in sira nian), kontinua kesar ninia funu-baluk no ezije justisa; maibé juiz, “ne'ebé la hamta'uk Maromak no ema sira”, la fó atensaun ida ba nia... Maski juiz ne'e toos no la hanoin, ikusmai nia halo justisa ba fetó-faluk, atu bele livre husi ninia insisténsia. Hodi apresenta ai-kanoik, Lucas fó ninia aplikasaun teolójika (vers. 6-8). Se juiz prepotente ida no laiha sentimentu laran-sadia bele rezolve fetó-faluk nia problema tanba ninia insisténsia, Maromak (la'ós juiz ida lahó fuan) oinsá mak la rona ninia “ema sira ne'ebé lora-kalan bolu Nia no la halo sira hein tempu kleur?”

Konserteza Maromak ne'ebé nakonu ho laran-sadia no defende ema fraku sira sei rona nia oan sira nia hakilar.

Haree ba kontestu ai-kanoik nian, ita iha serteza katak Lucas hakarak dirije ba comunidade sarani ne'ebé mundu rai kuan, no hahú haree persegisaun sira, no hahú dezanima tanba haree hanesan Maromak la rona fiar-na'in sira nia hakilar no la intervein iha mundu atu salva ninia Kreda. Lucas nia resposta ba sarani sira mak tuirmai ne'e: kontráriu ba buat ne'ebé sira haree, Maromak la husik ninia Povu no taka tilun ba sira nia apelu sira; Nia iha projetu ida, nia iha planu ida no iha ninia tempu rasik atu intervein... Ba fiar-na'in sira presiza de'it modera sira-nia impasiénsia no konfia iha Nia no nia sei la husik atu intervein no liberta sira. Nia relasaun ho orasaun sá loos? Tanba sá mak ai-kanoik ida-ne'e mak ai-kanoik ida kona-ba nesesidade atu harohan, hodi la dezanima” (– vers. 1)? Lucas husu sarani sira katak, maski Maromak hatudu silénsiu, ita keta para atu halo diálogu ho Nia. Iha diálogu ne'e mak ita komprende Maromak nia projetu no nia ritmu sira; iha diálogu ne'e mak Maromak nakfilak ita-nia fuan sira; iha diálogu ne'e mak ita aprende atu saran an iha Maromak nia liman no konfia iha Nia. Liuliu, Lucas hakarak hateten katak la iha buat ida (dezánimu, deskonfiansa hasoru Maromak nia silénsiu) lori ita atu deziste ba komuñau loos no kle'an ho Maromak.